

江都縣志卷之二十二

江都縣知縣

五格
黃湘
重修

人物 篤行 尚義 百齡人瑞附

昔陳仲弓德動當時教成不肅則導民興行者不賴有好修君子哉施於家及於物總生平而論之稱完人者尚矣至慷慨以行其義卽一事而未嘗不卓卓可紀亦所謂遵彼行誼足化澆漓也採其風還以想見其人不致遺於昔亦不敢濫於今固惟徵其可信者爾志篤行

五代吳元嗣子孫壽皆百歲上下累葉同居不分至吳江都縣志 卷之二十二 篤行 一
琬愷義尤篤太守陳正平聞於朝賜號義門置順義二臺以旌之

元秦昭少遊京師其友鄧載酒祖餞俄昇一殊色小鬟至曰此主事某託買妾也幸君便航附達昭弗諾鄧作色曰縱君自得之不過二千五百緡何峻辭乃爾昭強從之至臨清天漸暄夜多蚊納之帳中同寢抵都下置舍館主婦處持書往見主事主事問曰足下與家眷來耶曰無有主事意不悅隨以小車取歸踰三日謁謝曰足下長者也昨已作簡附便報鄧公使知足下果能不辜付託之意矣後昭之子孫咸至顯官

劉信甫郡富商曹氏奴曹瀕死以孤托之孤漸長其叔利孤財妄訴於府曰某貲產未嘗分析盡爲姪所據郡守劉察其詐直之叔之子以父訟不勝慚憤毒父死而復訴於府曰弟挾怨殺吾父適達魯花赤馬馬火者受署之初與守不相能竟欲置孤法并以中守引致百餘人皆抑使誣執孤殺叔守受賄之詞末鞠信甫信甫曰殺人孤實不知守亦無受賄被榜無完膚終無兩詞初信甫先遣人密送孤至京師匿一貴人家至是乃厚以金帛賂達魯花赤孤得免信甫減死旣而叩蹕稱冤達魯花赤以罪去守復官是訟費巨萬計孤欲算償信甫

曰奴之富皆主翁之蔭也主有難奴幸脫之其職也寧望報力辭不受

明顧黑子揚州人與其主顧圭以戎籍隸泉州洪武初圭坐事繫獄累歲黑子曰採薪貨以供圭圭釋歸復以甘脆爲圭養圭死其子窶甚黑子自爲酒家傭給贍其衣食更爲娶妻人歎黑子微賤而有士君子之行

郝理北京錦衣衛籍生十齡而孤家故貧旣而貧益甚有從父梁賈揚州富巨萬理依之正德末中貴擅權羅諸大賈逮詔獄梁亦在逮中諸大賈相顧愕眙謂往當論死矣理挺然請身代梁往旣對簿申冤狀反覆數千

言不少絀刑曹爲白其事竟得赦梁并諸大賈賈咸願奉金交驩理却不受初理歸梁梁以凡兒畜之至是始重理理遂移家於揚梁卒理嗣其業又十年其富十倍於梁理性好結納饋遺諸父執歲不虛遇貧乏之士尤時時周贍之子莘登嘉靖丁未進士仕至湖廣布政使叅政理以子貴封奉直大夫

陳東山字魯望慷慨多大節其所親嘗寄千金逾十數年死東山召其子還之封識如故又嘗挾千金賈穎上僕盜其半事覺株連數十家東山白於官罪止其僕衆得免累穎人德之

賈寬字朝用嘗暮歸道拾遺金守其人至還之遺金者分半貽寬弗受餉以雞黍亦却之里有死不能棺者傾橐以助不給則質貸以供未嘗望報焉

史宗顯字及達知書重義有山東元克孝者來揚與宗顯善其妻亡子繼歿子婦抱夫木主自縊克孝貧不能殮宗顯爲之棺殯擇地以窆令子孫世掃墓祀之通州貢士楊孟堅亦善宗顯除興安判止一子次廣陵猝亡孟堅慟絕不欲之官宗顯勉其行以一婢贈之冀其生子孟堅竟卒於任所適宗顯遊崇川孟堅見夢於其友孫孟揚曰明日史君來爲我謝之詰朝孟揚訪得宗顯

於客舍語以故驚異因爲歸其喪宗顯以明經授兩浙
運判遷福建理問卒年七十二

卞珰字汝用世務農業治家有法五世同居士民推舉
嘉靖十三年有司覈實上之詔旌其門

史起敬字德聚國學生授建昌府經歷曾破流賊活俘
民有功當擢用卽乞歸弟起聘少孤比長析產起敬推
身所積者均分之每濟里人困乏咸號爲長者

夏應芳字元成父翠幼孤貧鬻蔬奉母甘旨未嘗缺應
芳中萬厯戊子鄉試性豪俠喜結客名聞於時浙人沈
氏以傲筇寄應芳家日藏書十餘年不取沈死應芳訪

江都縣志

卷之二十二 篤行

四

其子歸之封識宛然發之書所覆皆白金計五百餘兩
其子初不知方貧無食於是感激終身里有不孝子李
打虎性兇暴虐其母應芳使勇士縛之令其母坐上坐
扶之數十其人叩頭流血長跽母前請罪應芳令坐母
側與食飲勸勉遣去後遂爲孝子應芳會試屢不第會
明末黨事熾遂絕意仕進卒於家

鄭之彥字東里本歙人遷江都爲郡諸生五世同居稱
義門宗伯姜逢元謂其生平然諾無二言閨幃無二色
云

劉有恒其先河津人家江都以明經貢太學內行修謹

性好施有惠於鄉里嘗獨行遇羣盜中有識之者曰劉貢士善人也不可傷護送之歸

洪良俛字俛如歙人家於揚以孝友聞廣設祭田力任族中婚嫁之事周卹貧窶為善若惟日不足者死之日閭里歎息焉

徐心繹字紳之心繹父然諾不侵有賈客寄金十七年矣其孤來出付之封識宛然見者嘆服心繹以孝聞讀書究天人性命之理於鄉黨恂恂焉仁而愛人子宗健篤於交誼有友以誣坐大辟者力救得釋其家蓋代有懿德云

江都縣志

卷之二十二

篤行

五

劉先聲其先由關中家江都崇禎間拔貢舉孝廉方正篤於行誼好急人之難凶歲捐貲倡賑鄉里賴之湯來賀司理揚州禮重者惟先聲一人

張福黃國相之僕明末福與國相同遇兵國相死福頸被劊止氣顙未斷脇下亦被數刃從積屍中以手捧頭匍匐奉主媪匿僻處主媪以弱篋支其頭越數日勢定劊亦稍愈始獲送主媪詣北鄉而幼主被繫至金陵福行乞遍走諸營於牧場得之至夜背負歸黃氏母子復聚而福亦終老其家焉

福與前劉信甫皆義僕依後漢書獨行傳李善例載入

國朝郭梁明侍郎任之後以孝友聞鄉里行年八十有八

樂善不倦舉鄉飲賓

鄭元化字贊可自歛徙家江都壯歲以勲戚官金吾慷慨多雄畧不避權貴見世多故傲屣一官伯仲兄皆起家通顯元化終老菟裘布衣蔬食泊如也惟型仁講義篤行誼於鄉一時咸尊尚之

朱維夔字龍文邑諸生五歲母亡育於庶母吳氏孝養不異所生爲服三年喪以慈母禮報之家故豐於財世變後驟貧異母昆弟凡七人析箸時疑爲督者有所私維夔涕泣譬曉諸兄弟感動益相親舉宗義之從兄有孤貧者日供錢米養之平生師友之貧者至白首猶禮於其家人以爲難鄉里有忿爭必曲爲之解或已訟於官則爲出錢以平之及卒鄉之會哭者至二千五百餘人其行誼蓋特著云維夔好學博覽圖籍自左國史漢唐宋諸大家皆手抄箋評旁及諸子稗官天文地志醫卜農桑之書亦記誦無遺尤素以通儒稱於世

史大生字印室事親篤孝乙酉城陷兩兄以文學死義奉兩嫂如母三十年如一日婚女姪先己女以時成禮日吾分內事也生平強仁慕義人恒多之卒之日自整衣冠與親友拱別若將他適者

張振先字心和揚州衛指揮恒孫睦嫻任恤黨族有待

舉火者遇人急則周之所代舉之婚喪甚多不欲使人知也子濂邑諸生篤於孝友嘗割股以療親疾父子相承皆有潛德焉

倪成三世同居家風雍睦有司及部使者旌其門

陳三恪字脩之能文章而不急於進取當歲薦三讓於同輩之遲暮不能待者事孀嫂如母爲表其節嗣其後族人有蝕恪產者置勿校更爲之葬娶每以學者言不逮行爲恥故躬行恒篤

魯鑣字駿閑邑之宜陵人性孝友慷慨尚義鄉鄰有急難解橐救之無德色爲祁門學博談經課藝遇諸生之江都縣志

卷之二十二

篤行

七

貧窶者則分己俸給之後遷京秩洒然而歸有司式其行誼舉鄉飲賓

蕭維基郡諸生侍親疾以孝聞歿而哀毀骨立兄弟同居至老無言色之間居恒尤務施濟親友每待給焉維基邃於學著有四書集訓易經集義史論正訛諸書于應鯤字翔溟篤行誼與伯兄分產取其瘠者宗族子孫貧者與以母錢俾爲生計歲饑濟之粟不能婚葬者助之財力行數十年至老不倦年八十考終卒之前誠子孫曰族人以服爲差要必吉凶同患庶不致相率而爲途人世咸躋於其言白田王巖爲之傳

程量入字上慎本歛人遷江都天性孝友於睦婣任恤之誼甚篤生平尤多隱德有因所識以物質者金已酬其人沒諸已質者問訊於門量入曰吾偶忘未卽畀耳復如前數與之後其人聞而愧謝衆始知又家人嘗置輸餉銀案上量入午眠帳中有潛持百金去者量入實見之及家人誣其數缺則曰吾別有所用之矣家人疑而微偵焉乃終未嘗有神色之露晚歲弗良於目恒命其子裘金差輕重置案屨中客或有所請卽取而納諸其袖貧老之故人至者冬月必撫其背單寒則起探籠中裘絮令著以出其陰行善者類如此郡守詳舉量入江都縣志

鄉飲謂孝友不聞人言懿行無慚往哲蓋實錄也子六人長之諤最著諤字象六性倜儻具局幹才量入以急公好施予又每爲知戚假名字稱貸久之積逋逾二十萬諤獨肩償之不以波諸弟至其經仁緯義拯人於患難死生者實具有古烈士風閭里中雖童孺亦知稱道之康熙甲寅乙卯間籌餉助國晉秩五品量入一脉之子孫至三百人諤之子孫近二百人成進士官中外者弗絕人咸謂厚積之報云

葉世華字君實性孝友讀書礪名節行多長者嘗出遇二人闕於途甲曰以女許我而女去室必另嫁乙曰向

實以貧故質於人經世亂莫知所在世華叩姓名本末知乙女卽昔所買婢也引二人歸破券以婢還之前高傑爭鎮圍揚州進士鄭元勳爲諭解環聽者誤其語立殲焉世華故與元勳友善夜求得餘骸裹而送其家又嘗捐貲修范公堤使海溢不爲災竈民登衽席者萬戶生平好行其義鄉里爭重焉年七十預疏屬續時日及期端坐而逝長沙陳鵬年追慕之爲作傳

楊敏芳字蘭佩陝之涇陽人爲名諸生父罷宦僑江都歲必再省覲旣卽棄學籍侍父養有勸其進取者謝曰金紫何如斑衣之樂也事兄極友愛寢興飲食與俱性

江都縣志

卷之二十二 篤行

九

仁厚惠澤周黨閭間嘗施棺槨軫窮乏之饑寒設藥局於三元宮以療貧病者遺額迄今猶存敏芳學問淵博尤究心於儒先宗旨其爲文師秦漢唐宋諸大家詩亦雅粹甯都魏禧無錫顧祖禹輩咸服膺之稱之爲揚州楊仲子所著有流音園集行於世

卞震陽字長卿順治丙戌副榜性孝友讓應得之產給兩弟焚債券數千金有盜賣其別業者置不校嘗途行爲擔負者觸落二齒家人怒執之震陽曰此無心失也急揮使去其器量如此

程奭字青來本歙人僑江都補郡庠生躬修六行以孝

友仁厚稱鄉里性尤慷慨好義歲己丑客游湘潭夜泊
河干聞哭聲哀且衆曉起見白骨山立其地蓋戰壘也
盡出橐金收瘞之湘人建亭以志其德又邑紳某者罹
誣罔將得重咎奭捐重貲救之畧無吝色

汪如江先世新安後家江都少慕交游重然諾負榦濟
才屢徵不出生平持躬砥行有長德之風鄉里咸尊尚
之舉鄉飲賓人謂不媿子懋麟成進士爲世名賢如江
卒遠近之會弔者如臨陳仲弓喪

史在策太學生居嘗置義學教族黨子弟事師甚謹歲
饑出粟作糜以賑鄉里疫施榻榻以瘞死者家僕誤聘
江都縣志 卷之二十二 篤行 十
良家女急毀約謝之子衡爲名諸生以文行式庠序孫
慶義申義後先成進士慶義官吏部郎申義由翰林歷
禮科掌印給事另有傳

方成可字贊五孝子立禮子也少崇儒術爲學諸生立
禮伏闕上書歸不復治生產成可遂仔肩其家先幾達
變業以漸豐性慷慨好行其德資給婚嫁周恤貧窶以
及瘞骼贖俘皆揮重金不惜以賑饑邀

恩褒由明經授內閣中書舍人病革時凡負逋者悉焚其券
數踰萬金子願善官楚雄府同知願仁康熙丙子科舉
人願瑛廣東按察使孫天育亦丙子舉人

葉禹臣字九疇世華子也承父風以孝友聞事寡嫂及撫孤姪者曲盡恩禮特逆藩初平豫章兩浙之婦女多流落揚淮間禹臣倡同志捐金代贖訪其家歸之先後約數百人嘗經業於場土梟糾衆劫其貲刃傷其腹幾殆官司爲捕治論大辟者五絞者七遣戍者數十人禹臣轉惻憫之爲貸死止坐首惡生平見義勇爲家累萬金隨手輒盡晚雖漸貧猶解推不倦也年踰大耋強健如未五十人

聖祖南巡其長子震掖迎道左承

顧問

江都縣志

卷之二十二

篤行

十一

御書椿永額並出上方人獲賜之贊善趙執信爲紀其事

吳于悌字愷仲本歙人家江都少孤事母以孝稱性倜儻慷慨好行其德康熙己未歲饑捐金設賑賴以全活者甚多御史郝浴上其事 朝議嘉勞之授七品秩後馳贈朝議大夫子元誠字言修承父風篤行撫孤樂善好施予遠近稱爲長者其長子國士官監司封元誠中憲大夫三子仕遴敦行誼能不昌前緒

梅魁先字占百以序貢入成均與友王孝廉賓同客京邸賓嘗以百金寄魁先所無一人知者及賓聞父歿哀慟死魁先歸里至其家出原金置靈几上封識宛然泣

而還之

方如珽字子正歛人家江都孝友惇篤然諾不侵鄉里素稱重之生平尤好行其義置船救生江上生得者給篙師厚賞死者買棺瘞而識之又捐增園園中饘粥日以爲常每歲計糜千餘金終身行之不怠其他睦姻任卹則孳孳焉若惟日不足也子爲源字清其邃於學而行紹其父踵前徽者歷四十年爲源子愉雍正癸卯舉於鄉

程洪字士莘生具至性數齡居父喪哀毀如成人奉孀母極孝事兄交友克恭克義有故戚家中落僅一子遠

江都縣志

卷之二十二 篤行

十一

出十餘年不知所往洪爲募人四出求得之以歸適其父病將殆獲一見其子而卒洪更經理其喪葬爲其子成室家又黨族中有貧不能婚者輒與以金完娶秘不使人知其生平之篤行類如此洪才美而好學所梓有詞潔唐詩快記紅集行於世子三梅尤有聲閭里

唐詩字盛唐父之天家素饒破產贖亂後子女之被掠者甚夥母萬氏亦傾篋助之由是家遂匱父卒母獨教詩讀書詩年十七補諸生旋食餼雅善詩文工楷法而甘貧守素教授生徒至老得歲薦於榮利泊如也一中表饒於產而無子憤其弟願以已產立虛券授詩詩嚴

拒不受其不以冥冥墮行類如此子六人登科第列仕籍者五紹祖己丑進士由翰林出守湖州改戶部郎中繼祖辛丑進士歷官湖廣按察使繹祖舉人官河南開封府同知續祖由辟薦官大興令綏祖舉人歷官廣西按察使唯長子顯祖不仕顯祖字右文名諸生也內行克修立身循循有規矩諸弟皆貴顯祖以禮法束其家披褐徒行對人歆然如不足當事有以賢良方正舉者謝弗就人咸稱其有潛德焉子玉衡郡諸生績學早世嗣子倚衡舉於鄉

管士俊字師明至性過人父病憂戚廢飲食禱天願以江都縣志

卷之三十二

篤行

三

身代父瀕危而瘥人謂其孝有格于神明者精醫學活人者無算未嘗責報嘗捐產以賑其黨族人稱爲篤行君子子玉音字雲和際世亂奉父避興教寺佛閣兵猝至將刃父玉音以身蔽號泣甚哀兵憐而釋之母避居大金溝亂甫定著草履走百餘里迎以歸踵盡瘡潰父歿事母極孝母年九十七而卒玉音年八十矣悲慟聲不能續匍匐支離不十日而殞子二宏選另有傳宏進見辟薦

王復衡字山公以恩貢入太學爲龔鼎孳熊賜履所器重居家篤於孝友宗黨中待以舉火者甚衆孀姊二俱

養於家待諸甥如已子籍隸儀徵儀正賦外有五股差徭之累復衡爲力請制撫得永禁通邑德之需次主事恬於仕進不就補累封朝議大夫屏跡莊園惟泉石自娛而已子十二人登科第者四文謨中副車誥丁丑進士歷官司經局洗馬提督四川學政文師壬午舉人文充癸丑進士由翰林官處州府知府餘皆以學行重鄉里諸孫升賢書者踵接餘暉特炳煥焉

汪朔周字曼思歙縣人業鹺遷江都以孝友爲行族姓中多荒田賠糧之累朔周捐置腴田以歲入抵糧永爲之贍戚黨中有急解推不少吝舉鄉飲賓子文蘭克承江都縣志

卷之二十二 篤行

十四

其志孝義樂施亦多善舉
錢邦宸字印陽敦倫飭紀樂善好施郡守崔華嘗旌其齒德後郡守施世綸舉膺鄉飲酒禮

余士覲字瑞輯新安人家江都少時父病不食亦不食至愈乃已年逾七十歸里改葬其親徒跣數十里哀慕如初喪行路爲之生感爲族子婚娶無子者更爲置媵衣冠子女之淪落者捐贖之親族貧不能殮者爲具棺槨歲遣人市木於饒儲積以備所需後先約五百具至育嬰救生倡賑尤行之必力舉升賓筵年八十五以無疾終

閻甯生字天皆歲貢生篤於孝友其季弟班生早世悲
念不已日往號於其墓聞者哀之謂昔劉紆之哭其弟
者不是過也班生聘吳氏女未歸而矢守貞之義甯生
經紀顧恤之俾得終其節生平以禮義自閑經明行修
游其門者後先逾百人蔚然負儒林之望焉晚年授望
江訓導以老疾辭

程渭航字于磻之諱長子程氏旣代有懿德渭航實能
作求而祇適之孝于親友于兄弟總修百行有大人長
德之風主鹺政者引爲祭酒渭航直道正辭貞固足以
幹事隱括足以矯時蔡邕之稱郭有道宏深廣大者其
江都縣志

卷之二十二 篤行

五

姿量有不愧焉母年近九十渭航亦年將七十矣雖衰
病孺慕之誠弗替子章以文行致遠名夢發能纘承其
緒

管宏選字彥遴邑增生九歲失母哀毀如成人奉後母
同於所生執其喪悲慟兩目爲瘡撫庶弟曲盡友愛生
平規言矩行鄉里比之爲王彥方其讀書必窮義蘊尤
工舉子業從游多獲雋者已獨數奇不偶恬然以義命
安之子三人鑰緒宣皆能世其學宣以名諸生精醫理
就診者戶外屢常滿心乎濟人不少自憚其瘁遂積勞
而殞人多惜之緒子一清成進士入翰林

劉夢錡字端調世其父冀鏐學以名諸生入成均著述能發義理之精蘊母早亡事父極孝終夜必抱父足而臥父歿所嗜飲食終身不進性仁厚有以子女就典鬻者必量其急周之而俾其子女得善所儀邑吳姓者乍交也疾篤以老母幼弟托錡養之數十年且爲其母治喪爲其弟授室焉

鄭重光字素圃幼篤天性事父母至孝父歿撫弱弟翼之成不忍使另爨者終其身教育諸姪同己子葬先世及伯叔從兄弟未葬者十七柩卜阡隴謹封樹經營殫心力焉由金陵至蕪湖大堤亘二百餘里其曾祖所築

也經其地見有圯缺者捐貲倡土人修治之父當變遷時聞有風連雖其人之子孫不及知無不按籍償之悉舉先世遺書付之梓晚以醫名纂有傷寒條辨傷寒證辨傷寒論翼及溫疫論各續註凡四種又自著有素圃醫案書皆行於世舉鄉飲賓子鍾蔚貢生以文學著亦精醫

汪文煥字有章歛之叢睦人遷居江都幼嗣其叔父後奉嗣母孝養備至爲疏其貞節上之臺省得請旌於朝立坊表焉以本生母死海氛難節尤烈格於例未獲旌終身飲泣至老不忘其哀撫孤姪如子賑貧周急遠

特予優叙乾隆二年歲饑煮賑城南者三月活災民數十萬
近稱爲孝友而長者子玉球字東在敦篤行誼於黨族
友朋無不吉凶同患者聞利濟民物之事輒勇爲之歲
常糜數千金雍正七年捐完其故里歛縣逋賦由會題
制撫又歷哀其善行以聞議以員外郎卽補用文煥封
中憲大夫

張師孟字象巖孝友愷篤以恩誼急宗族鄉黨友朋凡
婚喪緩急之事必盡力遇販負之貧乏者輒周之他如
拯溺救焚贖子女施棺絮及飲給落魄之行旅皆歲糜
重貲不恤久之遂自耗其業而孳孳爲善晚年至鬻產
以濟焉其卒也閭里中咸嗟慟之

江都縣志

卷之二十二

篤行

七

李衡字元宰事親以孝聞處兄弟間極友愛睦雍之化
刑於妻子居恒修言謹行於鄉黨恂恂如也嗜讀書寒
暑達旦以爲常文章卓然成家康熙癸巳舉於鄉以詩
經魁本房計偕北上同年友多依附之衣物任所取攜
往返費皆取辦於已雖稱貸以濟絕不露拮据狀使同
行者弗安歸而益淬厲於學久之以積勞卒

汪應庚字上章歛之潛口人家江都祖象原父時行皆
敦行不怠閭里推爲長者蓋世有隱德焉應庚尤能繼
述而光大之睦嫻任恤惠無不周義撫外父之遺孤保

其業海嘯災作糜賑場竈者三月江溢洲民流離應庚先出重金撫其家爲汎粟米往給之又設藥廠療治之麥秋未稔時更按戶給以口糧是舉計存活數萬人所費者不貲其於鄰邑之興化丹徒亦博濟焉事聞

世宗

賜爵光祿寺少卿應庚又以五萬餘金修府江甘三學以二千餘金製祭器樂器以萬三千餘金置學田爲歲修費及資鄉比士膏火乾隆三年歲饑首捐萬金倡賑繼復獨增公廩賑粥一月糜白金四萬餘兩所哺至九百六十四萬餘口七年淮揚水患特甚時應庚已臥病急出銀六萬兩輸諸公以備賑濟之用蓋誠心乎仁者

江都縣志

卷之二十二 篤行

六

也嘗修蜀岡之平山堂觀音山椿靈寺西湖之靈隱寺建五烈祠立坊表其墓擴在城之貞節祠新其宇營故里之宗祠者費逾數萬輦金以給其宗人亦數萬他如拯溺育嬰施藥皆爲善若不足然未嘗沾沾自多每拜國恩議叙則歛然不敢當三舉鄉飲辭不赴死之日遠近哭而弔者踵趾相錯於道揚人士爲製主平山堂祔歐陽公歲祀子起甯波府知府

張四可字薪南陝之臨潼人家江都讀書務實學動必以先民爲程撫從兄子爲殖其業弟早世遺孤三人皆教育之成名譽黨族之居邗上者無不比飲焉尤篤於

故鄉宗族歲有常周遇凶荒則輦金以濟俾免流離遷徙之苦代輸其里中逋賦者至再立義塾以教其鄉之子弟人皆多其長者以積行升聞授同知卽用仍加級隨帶念母老請終養其卒也潼邑人請祀之鄉賢

汪從晉字錫三先世由歙之叢睦遷江都代有懿德父守仁嘗以數萬金循服次贈族人從晉承父志樂善不倦置常稔之田以贍其宗代輸江甘之逋賦以甦繫索者建會館京師爲同鄉謁選及就試者所棲止他如救焚拯溺助婚喪濟醫藥育嬰施櫛諸事歲糜數千金以爲常人有欲以緩急告者或囁嚅未卽言從晉揣其意江都縣志

卷之二十二

篤行

九

必逆叩而立應之於友朋絕甘分少四方賓客咸資爲外府雖竭歡盡愛無厭忘色也性孝友好讀書尤工於詩親歿後慟祿養不逮卽曹需次旣及符迫終不赴其卒也人咸惜之

吳家龍字步李世家歙縣遷江都襁褓而孤及長奉母以孝稱篤賦醕謹其於鄉黨緩急多所賙卹每遇荒歉輒傾貲籌賑以樂善好施著事達

朝廷予爵監運副使乾隆三年歲饑助賑七千餘金七年復賑三千餘兩銓

部題請議叙累予加級紀錄嘗修揚郡之寶輪寺靜慧園

整圮植廢梵宇巋然以及治道塗而便行人施續襖以衣貧乏所費不可勝計凡所以見義勇爲而恐後者蓋根乎天性之肫篤家庭雍睦子孫孝友里閭咸以敦善行而獲報者首推之

朱珣字與白歙人曾祖遷江都讀書精覈才識沉練生平兼修六行嘗葬先世十一棺重修宗祠之在歙者代完遠近族逋賦數千金倡同輩給江甘獄餅置救生船又獨給江甘儀徵遞解飯食廣育遺嬰士族子女不得所者撫育婚嫁之其他解推周卹之事尤多云

謝余銓字衡士江都人廩膳生四歲喪母母姊余嘗鞠育之銓孝事之如母父喪三年寢處外舍未嘗茹葷飲酒旣葬常徒步繞墓呼號風雨勿間後竟以過哀卒墓所銓爲晉太傅安後安祠佔於僧銓白諸官展轉五年終復其舊工詩善書負時望三十年士林惜其不遇焉

尙義

明閻金字體礪其先陝西人父琮爲合肥主簿罷官貧不能歸因占籍江都金任俠好義嘉靖戊午倭闖江淮知府石茂華發民守城民望見倭薄城率股栗時西北賈客揚州者數百人金召其豪共登陴射殺其渠魁倭聞陴間多塞上人語又疑其矢非邊外勁弓不能發遂

宵遁境保無虞金以是名聞江淮其孫士選士聰會孫汝梅皆魁鄉舉登進士

潘起龍字雲從練習世務而舉止樸野如老農幼貧傭書以養親後爲臬掾持正不阿副使鄭二陽治維揚有邑令以硯餽者識其函甚密起龍揣知之曰石何堅重如是二陽啟視金也嘆曰非子乃爲若市矣因叱去之又一令以賄入人罪親持爰書上謁起龍執轡揮闔者曰公出須歸乃讞二陽召問起龍語之故歸而平反其獄有神明之譽以是益器重之凡郡內修學葺城築隄防濬漕河諸大工役委屬起龍董其事銖黍不侵而程江都縣志

卷之二十二

尚義

三十一

功特善掾史中篤義士也

扈國學字翼民明末高傑縱兵擾邗東將及仙女鎮國學率鄉人各持鍋蓋一矛一以禦之號鍋蓋軍事聞給冠帶不受孫際興穀城知縣

謝良瑜字鍾山居江都之邵伯明末盜賊蠡起犯其里瑜團練義勇捍之保全者萬戶當途上其事授之官不受性勁直閭黨有曲直咸質成於瑜得其言卽折服事關民社者恒條其利弊上之司牧多取資焉尤好施予三黨賴以舉火者甚衆歲祲出粟以賑里中貧困之家舉鄉飲賓人謂不愧典禮

國朝汪文德字是修先世祁門人家江都文德自祖父來同居四世崇禎庚辰歲饑捐貲倡賑多所存活乙酉揚城破文德與弟文健詣軍前謁豫王獻三十萬金犒師曰願王下令勿殺王義而許之欲授以官辭曰無才請歸里給一木符令還

湯肇修字秉揆負氣不諧於俗而見義勇爲里中饑疫流行設饘施糶日費數十百緡不惜復捐高原之產爲義阡以葬流移之殞者

胡夢豸字去邪先世上虞人遷江都性至孝康熙甲寅年二十二隨父歸越省祖墓父過市遇山賊劫民財豸

江都縣志

卷之二十二 尚義

三

父嗔其不義賊怒將刃之豸從後急奔至以椎擊仆賊市民遂羣起毆殺賊賊衆大至欲屠其里豸曰不可以我故危一鄉也挺身入賊寨請罪遂被寸磔求遺骸不可得里族感其義爲購首藁葬歲時致祭焉

程有容字休如醕謹慕義嘗置義田以贍宗族城南有敗闡巨楠數百沉於水舟觸之立破多有溺而死者人目爲神椿不敢議有容捐重金涸水拔之其患遂絕歲稔請於隄使出金粟助賑身任其勞事聞

恩賚有加焉

黃家珮字鏘鳴歙縣人徙居江都事親志物咸盡居貨

而能施康熙乙巳海溢捐金修范公堤大水游饑多方設賑全活甚衆

耿兆紳字賢書兆組字玉書兄弟也皆邑諸生性皆倜儻好施與兆紳置義田以贍宗族設義渡以濟往來又多募瘞枯骨歲凶每出粟賑饑兆組亦置有贍宗義田嘗代輸貧民逋糧又捐田助囹圄獄食立義塾以教鄉之子弟建瓜洲普濟堂輸產其中俾得要諸久遠至賑凶荒施棺絮掩骼埋胔皆樂爲之兩人俱列通志周大有好施濟精於醫每能愈人奇疾遇貧者不取藥值且解橐助焉人多稱其義

江都縣志

卷之二十二

尚義

三

吳禧祖有慕於利濟爲行乾隆三年丹徒災禧祖出萬餘金購粟米往賑焉丹民德之爲請於官司勒石以紀其事

朱勉仁字韞魯素慕義多惠施倡立日積堂會率里人日輸一錢堂中纍之以周貧乏之事易舉而所資於黨閭者其用不竭人謂其法良可久邑令沈嘗褒旌之子履霖俱登武鄉科

汪鶴齡謙謹而樂善濟窮乏之助婚喪鄰族多賴之年未四十而卒哭之者甚衆妻朱氏以節著

羅尚斌素行謹厚子汝一亦如之有家人拾遺金數十

兩汝一請於父急命覓先者還之又嘗於遷居時還舊屋主遺金人咸謂其古處

江承炳字雲岑素好義修理衢路橋梁凡百餘處助賑濟窮奚止萬計舉鄉飲不赴題敘固辭人恒德之

百齡人瑞附

依舊例附編男婦並載

五代吳琬江都白砂村人壽過一百歲步履康健視聽不衰州府問勞俱稱翁父元嗣在日義聚不分守臣聞於朝特賜旌表

明倪氏丁元素妻砥節守貞壽至一百有四歲互見列女傳

江都縣志

卷之三十二

百齡人瑞

十四

田氏丁達妻壽登百歲奉旨旌表建坊小東門內

國朝熊氏閔源妻本歙人居江都康熙辛亥年壽登百歲

孫本正姚安府知府

朱文鼎字公調東鄉許家閘人康熙丁酉年壽登百歲奉

旨建坊題曰昇平人瑞子勉仁入太學孫履霖皆武舉人

胡士魁縣民康熙庚子年壽登一百有一歲有司上其事奉

旨建坊旌表

劉氏邵伯鎮人許長卿妻雍正甲辰年壽登百歲